

ANUNCIO

Sendo definitivo automaticamente o acordo de aprobación inicial do Regulamento do Consello Escolar, aprobado en sesión Plenaria do 30-11-95, e dando cumprimento ó disposto no artigo 70.2 da Lei Reguladora das Bases de Réxime Local, faise público o texto íntegro do referido regulamento tal como foi aprobado:

REGULAMENTO DO CONSELLO ESCOLAR MUNICIPAL

LIMIAR

A Lei 3/1986, do 18 de decembro, dos consellos escolares de Galicia establece no seu artigo 15.2, que: "Os municipios que dispoñan polo menos dun colexio de EXB deberán constituír o Consello Escolar Municipal". No artigo 17.2 establécese tamén que: "Os concellos poderán tomar a iniciativa da constitución dos seus respectivos consellos escolares municipais, fixando as normas regulamentarias de procedemento e comunicándolle a Consellaría de Educación o acordo municipal adoptado". Así como na disposición adicional terceira posibilitase que: "Transcorrido o prazo a que se refire a disposición adicional anterior (de tres meses a partir da publicación da lei no *Diario Oficial de Galicia*), os que acordasen poderán tomar a iniciativa de constitución dos respectivos consellos escolares municipais de acordo co establecido no apartado 2 do artigo 17 da presente lei".

Polo tanto, desde as disposicións legais e da propia capacidade municipal procedente da súa autonomía, e vistos os artigos 27.5, 23.1 e 9.2 da Constitución Española, os artigos 27, 34 e 35 da LODE, 18.1.b) e 25.2.n) da Lei reguladora das bases de réxime local, é posible e conveniente a creación dun órgano municipal de carácter **participativo-consultivo** que designaremos co nome de Consello Escolar Municipal do Grove (CEM-O Grove).

Profesores, pais, alumnos, movementos de renovación pedagóxica, asociacións veciñais, titulares de centros privados e concertados, ao abeiro do disposto no artigo 16, apartado 1.b) da Lei de consellos escolares de Galicia, serán os sectores que formarán parte do CEM-O Grove segundo o seguinte regulamento.

REGULAMENTO DO CONSELLO ESCOLAR MUNICIPAL DO GROVE (CEM-O GROVE)

Artigo 1.—CONSTITUCIÓN

O CEM-O Grove constitúese como órgano de consulta e participación cidadá na planificación e intervención educativa do Concello do Grove coas finalidades e competencias que de seguido se desenvolven.

Artigo 2.—FINALIDADES

As finalidades do CEM-O Grove serán as de estudo, asesoramento e emisión de propostas á corporación municipal e á Administración educativa sobre todos os aspectos do ensino non universitario que incidan na nosa poboación, buscando a máxima participación de todos os cidadáns, entidades e organismos interesados no feito educativo.

Artigo 3.—FUNCIONES

O carácter de organismo participativo na planificación e intervención educativa non universitaria realizarase por medio das funcións que lle son propias ao CEM-O Grove: asesoramento, consulta, proposta e información nas cuestións seguintes:

- a) Convenios e acordos de colaboración coa Consellaría de Educación ou calquera outra administración pública, que lle afecten ao ensino dentro do ámbito municipal.
- b) Actuacións e normas municipais que lles afecten aos servizos educativos complementarios e extraescolares con incidencia no funcionamento dos centros docentes tales como transporte escolar, comedores, servizos de limpeza e conservación.
- c) Actuacións e normas municipais que afecten ou favorezan a ocupación real das prazas escolares coa finalidade de mellorar o rendemento educativo e, de ser o caso, facer efectiva a obrigatoriedade do ensino.
- d) Localización dos centros docentes dentro da demarcación municipal.
- e) Prioridade nos programas e actuacións municipais que lle afecten á conservación, vixilancia e mantemento axeitado dos centros docentes, de acordo coas competencias que a lexislación lles outorgue aos concellos en cada momento, e especial atención á suspensión de barreiras arquitectónicas .
- f) Fomento de actividades que tendan a mellorar a calidade educativa, a renovación pedagóxica, os principios de escola activa, e a integración escolar, especialmente no que respecta a adaptación da programación ao medio, para chegar a unha escola democrática, científica, libre, galega e non discriminatoria.
- g) Competencias educativas que lle afecten o ensino non universitario e que a lexislación lles outorgue os concellos.
- h) Na programación de investimentos en materia educativa.
- i) Calquera outro asunto que pola súa importancia para a vida escolar do Concello lle sexa consultado.

Artigo 4.-COMPETENCIAS

O Concello e a Administración educativa deberán consultarlle ao CEM-O Grove sobre as cuestións contidas no artigo 3 deste regulamento.

Artigo 5.-COMPOSICIÓN

Ao abeiro do disposto no artigo 16, apartado b) da Lei 3/86 e do artigo 31 do Decreto 44/88 dos consellos escolares de Galicia, o CEM-O Grove do ensino non universitario, estará composto polos seguintes membros:

- a) presidente: o alcalde ou o membro da corporación en quen delegue.
- b) vicepresidente: elixido polo Pleno do CEM-O Grove entre os seus membros de dereito.
- c) secretario: un funcionario do Concello.
- d) Vogais:
 - Mestres: 7
 - 7 do ensino público.
 - Pais de alumnos: 4.
 - Alumnos: 3
 - Directores de centro de ensino público: 1
 - Movimentos de renovación pedagóxica: 1
 - Asociacións empresariais: 1
 - Especialistas en temas educativos: 1
 - Escola infantil Concello do Grove: 1
 - Federación de Asociacións de Veciños: 1
 - Administración educativa: 1

Os mestres serán propostos por todos os sindicatos ou asociacións profesionais de ensinantes, proporcionalmente á representación obtida nas eleccións sindicais no sector docente do municipio.

Os pais de alumnos serán propostos polas APAS existentes no municipio, en función da súa

representatividade.

O director de centros de ensino público serán elixidos dentro da Asemblea de directores dos colexios públicos do Grove.

O representante do Movemento de Renovación Pedagóxica será elixido dentro dos seus membros polos MRP legalmente recoñecidos.

O representante das asociacións empresariais será elixido de entre elas.

O especialista en temas educativos será nomeado polo Pleno da corporación municipal.

O representante das AA.VV. será designado pola Federación de AA.VV. doO Grove.

O representante da Escola Infantil Concello do Grove será a súa directora.

O representante da Administración educativa será designado pola Delegación Provincial de Educación.

Os alumnos serán elixidos polos representantes dos alumnos en consellos escolares dos centros existentes no municipio.

Artigo 6.-ORGANIZACIÓN

O CEM-O Grove estruturarase en Pleno, Comisión Permanente e comisións de traballo.

Artigo 7. PLENO DO CEM-O GROVE

O Pleno do CEM-O Grove estará constituído polo presidente, o vicepresidente, o secretario e os vogais do CEM-O Grove. Para a súa constitución inicial será necesario que asistan, polo menos, os dous terzos dos membros que compoñan o Pleno. De non acadarse o quórum establecido, procederíase a unha nova convocatoria nun prazo máximo de 7 días, rexéndose para a súa constitución polo establecido no artigo 10 deste regulamento.

Artigo 8.- O Pleno do CEM-O Grove haberá de xuntarse, como mínimo, unha vez por trimestre, en sesión ordinaria e, preceptivamente, ao comezo e final de cada curso escolar. Poderá xuntarse en sesión extraordinaria se o considera oportuno o presidente, ou ben se o solicitan por escrito, como mínimo, unha terceira parte dos vogais do Pleno do CEM-O Grove.

*Artigo 9.—*A convocatoria das sesións ordinarias e extraordinarias do Pleno do CEM-O Grove haberá de realizarse cunha antelación mínima de 72 horas, acompañada da orde do día, na que se fixarán os puntos para tratar.

Artigo 10.- As sesións do Pleno do CEM-O Grove celebraranse en primeira convocatoria, sempre que concorra a maioría absoluta dos membros de dereito, e en segunda convocatoria, media hora despois de anunciada, se asisten, polo menos, o presidente ou vicepresidente, o secretario e un terzo dos vogais. Os acordos adoptaranse por maioría dos votos dos asistentes, podendo formularse votos particulares. Calquera membro do Pleno do CEM-O Grove ten dereito a examinar e recibir, se así o solicitase, copia das actas e da documentación das comisións de traballo, do Pleno e da Comisión Permanente.

Artigo 11.— Serán competencias do Pleno do CEM-O Grove:

- a) Debater e aprobar os informes e ditames referidos aos puntos expostos no artigo 3 deste regulamento.

- b) Elixir o vicepresidente do CEM-O Grove, a proposta do presidente.
- c) Elixir os membros da Comisión Permanente.
- d) Ratificar os presidentes de cada unha das comisións de traballo
- e) Aprobado a creación das novas comisións de traballo.
- f) Aprobado a memoria anual de actuación do CEM-O Grove.
- g) Aprobado o informe anual sobre a situación do ensino non universitario no municipio.

Artigo 12.—COMISIÓN PERMANENTE DO CEM-O GROVE

A Comisión Permanente do CEM-O Grove será elixida polo Pleno e asegurará a representación de todos os sectores. Estará formada por: o presidente, o vicepresidente, o secretario, os presidentes de cada unha das comisións de traballo, un ensinante, un pai de alumnos e un alumno. Xuntarase como mínimo, unha vez cada mes, e cando o considere oportuno o presidente ou un terzo dos seus membros.

Artigo 13.—As funcións da Comisión Permanente do CEM-O Grove serán:

- a) Preparar a orde do día das sesións ordinarias e extraordinarias do Pleno.
- b) Preparar os temas, os informes, as propostas e os ditames para seren debatidos polo Pleno.
- c) Xestionar os asuntos e acordos que lle encomende o Pleno.
- d) Coordinar o labor das comisións de traballo,
- e) Elaborar a memoria anual da actuación do CEM-O Grove.
- f) Elaborar o informe anual sobre a situación do ensino non universitario no municipio.

Artigo 14.—AS COMISIÓNS DE TRABALLO

Dentro do CEM-O Grove estableceranse comisións de traballo, que se poderán xuntar tantas veces o consideren oportuno os seus membros. En cada Comisión de Traballo haberá un presidente, un secretario e polo menos, cinco vocais. O presidente de cada comisión será elixido no seu seo, e ratificado polo Pleno do CEM-O Grove. Será membro da Comisión Permanente e portavoz da Comisión diante do Pleno. O secretario da Comisión, que será designado polo seu presidente, realizará a acta de cada unha das reunións e a orde do día de cada unha delas.

Artigo 15—No CEM-O Grove funcionarán, polo menos, tres comisións de traballo:

1. Comisión Pedagóxica.
2. Comisión de Equipamento Escolar.
3. Comisión de Planificación Educativa. As súas propostas serán elevadas a Comisión Permanente.

Artigo 16—O Pleno do CEM-O Grove poderá establecer outras comisións de traballo, se o considera necesario.

Artigo 17.—O CEM-O Grove para tratar temas específicos e puntuais poderá solicitar a asistencia de persoas de recoñecida valía ou coñecementos nunha materia, ou de entidades afectadas nun problema, que terán voz pero non voto.

Artigo 18.—O PRESIDENTE

O presidente do CEM-O Grove terá as seguintes funcións:

- a) Ostentar a representación oficial do CEM-O Grove.

- b) Convocar, presidir as sesións e moderar os debates do Pleno e da Comisión Permanente do CEM-O Grove.
- c) Autorizar coa súa sinatura os acordos do Pleno do CEM-O Grove.

Artigo 19.—O VICEPRESIDENTE

O vicepresidente asume as atribucións do presidente en caso de ausencia, vacante ou enfermidade.

Artigo 20.—O SECRETARIO. Serán funcións do secretario:

- a) Citar as sesións do Pleno do CEM-O Grove, que convocará o presidente, cando menos con 72 horas de antelación, segundo a orde do día que prepare a Comisión Permanente do CEM-O Grove.
- b) Redactar as actas das sesións do Pleno e da Comisión Permanente, que serán aprobadas na seguinte reunión.
- c) Calquera outra tarefa, relativa a funcións xenéricas da Secretaría, que lle encomende o CEM-O Grove.
- d) Custodiar *as Actas Artigo.*

21.—MEMORIAS ANUAIS

O CEM-O Grove ao remate de cada curso escolar elaborará unha memoria da súa actuación. Igualmente e como dispón o artigo 18, apartado 2 da lei 3/1986 de consellos escolares de Galicia o CEM-O Grove elaborará, ao remate de cada curso académico, un informe sobre o estado do ensino no municipio que enviará, para o seu coñecemento, á Corporación Municipal, e ao Consello Escolar de Galicia.

Artigo 22. RENOVACIÓN DO CEM-O GROVE

- a) O mandato dos membros do CEM-O Grove será de catro cursos académicos, serán revocados ou ratificados por metades cada dous cursos, en cada un dos grupos polos que foron elixidos.
- b) Os membros do CEM-O Grove que o sexan en virtude de representación que ostenten perderán a condición de tales no momento de cesaren como representantes dos seus colectivos.
- c) Os membros do CEM-O Grove designados por colectivos ou entidades poderán ser revocados se quen fixo a designación o considera oportuno.
- d) No caso de producirse algunha vacante, deberá ser cuberta nun prazo máximo de dous meses. O novo membro serao polo tempo que resta para completar o mandato.

Artigo 23. SEDES DO CEM-O GROVE

A sede e lugar de reunións do CEM-O Grove e das súas comisións serán locais municipais.

O Grove, 7 de febreiro de 1996. O alcalde, José Antonio Galiñanes Mascato

(BOP núm. 48, xoves 7 febreiro 1996)